



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

- Komisija za vanjsku i trgovinsku politiku –
Broj: 02/2-011-1001-10/03
Sarajevo, 16. 07. 2003. godine

**Z A P I S N I K
sa 8. sjednice Komisije za vanjsku i trgovinsku politiku
Doma naroda Parlamentarne skupštine BiH
održane 11. 07. 2003. godine**

Osmu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvao je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Anto Spajić, Velimir Jukić i Nade Radović, te Nevenka Savić, sekretar Komisije. Vinko Radovanović i Osman Brka bili su opravdano odsutni.

Osim pomenutih, sjednici su prisustvovali predstavnici predlagača: Anto Grbić i Andrijana Barišić iz Predsjedništva BiH.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio sljedeći

DNEVNI RED

1. Usvajanje zapisnika sa 7. sjednice Komisije za vanjsku i trgovinsku politiku;
2. Prijedlog Zakona o kretanju i boravku stranaca i azilu, predlagač Vijeće ministara BiH;
3. Obavijest o stanju ispunjavanja postprijemnih obaveza prema Vijeću Evrope – usmena informacija predsjedavajućeg Komisije;
4. Prijedlog Odluke o ratifikaciji Sporazuma o unapređenju i zaštiti investicija između Bosne i Hercegovine i OPEC Fonda za međunarodni razvoj, predlagač Predsjedništvo BiH;
5. Davanje saglasnosti za otkazivanje bilateralnih sporazuma između Bosne i Hercegovine i Republike Češke;

- (a) Trgovinskog sporazuma između Vijeća ministara BiH i Vlade Republike Češke od 20. januara 2000. godine,
 - (b) Ugovora o trgovini o plovidbi između Kraljevine Srba, Hrvata i Slovenaca i Republike Čehoslovačke od 14. novembra 1928. godine i
 - (c) Dogovora o saradnji na suzbijanju povreda carinskih i deviznih propisa od 12. novembra 1976. godine,
- predlagač Predsjedništvo BiH;
- 6. Dokumentat «Opći pravci i prioriteti u sprovođenju vanjske politike Bosne i Hercegovine», materijal Predsjedništva BiH;
 - 7. Izvještaj Stalne delegacije pri Parlamentarnoj skupštini NATO saveza sa Proljetnog zasjedanja Parlamentarne skupštine NATO saveza;
 - 8. Izvještaj sa Treće podregionalne konferencije Parlamentarne skupštine OSCE-a, Bern, 14. – 16. maj 2003. godine;
 - 9. Parlamentarne grupe za saradnju sa BiH, Informacija Ministarstva vanjskih poslova BiH od 20. 06. 2003. godine;
 - 10. Preporuke za Samit EU – Jugoistočna Evropa (prevod), Solun, 21. juni 2003. godine;
 - 11. Posjeta britanske Svepartijske grupe BiH, Informacija Ministarstva vanjskih poslova BiH;
 - 12. Tekuća pitanja.

Dnevni red je jednoglasno usvojen.

Ad. 1. Usvajanje zapisnika sa 7. sjednice Komisije za vanjsku i trgovinsku politiku

O realizaciji zaključaka 7. sjednice informirala je sekretar Komisije. U vezi sa jednim od zaključaka pod tačkom 5.: «da se na narednoj sjednici Komisije uz prisustvo predstavnika nadležnih institucija raspravlja o međunarodnim obavezama BiH», sekretar je je izvjestila članove Komisije da je dogovoreno da se ova rasprava odgodi za povoljniji period, nakon sezone godišnjih odmora, da bi se ostavilo dovoljno vremena nadležnim institucijama da pripreme cjelovit izvještaj. Prijedlog je da o ovom pitanju raspravljaju dvije komisije Doma: Komisija za vanjsku i trgovinsku politiku i Finansijsko-administrativna komisija. Ostali zaključci sa 7. sjednice su realizirani.

Nakon toga, Zapisnik sa 7. sjednice Komisije je jednoglasno usvojen.

Ad. 2. Prijedlog Zakona o kretanju i boravku stranaca i azilu, predlagač Vijeće ministara BiH

Predsjedavajući Komisije je konstatirao da sjednici ne prisustvuje predstavnik predlagača, pa je prvo vođena rasprava o tome da li će se odgoditi rasprava o Prijedlogu zakona.

Nakon rasprave, odlučeno je da će Komisija za vanjsku i trgovinsku politiku Domu naroda Parlamentarne skupštine BiH, u skladu sa članom 79. Poslovnika Doma naroda u

osnovnom zakonodavnom postupku komisijske faze razmatrati Prijedlog zakona o kretanju i boravku stranaca i azilu uz zaključak da se nadležnim ministarstvima Vijeća ministara BiH uputi dopis kojim će se izraziti nezadovoljstvo zbog odsustva njihovih predstavnika kada se raspravlja o ovako značajnom pitanju.

Ustavno-pravna komisija Doma naroda Parlamentarne skupštine BiH na svojoj 24. sjednici, održanoj 31. 07. 2002. godine zaključila je da je prijedlog Zakona u skladu sa Ustavom BiH, te da može ići u dalju parlamentarnu proceduru prema nadležnoj komisiji.

U skladu sa članom 81. Poslovnika Doma naroda, delegat Hasan Čengić je uložio amandmane na Zakon.

Nakon rasprave u kojoj su učestvovali svi članovi Komisije, Komisija za vanjsku i trgovinsku politiku Doma naroda je, kao nadležna komisija, jednoglasno prihvatila amandmane ovlaštenog predlagača delegata Hasana Čengića koji su postali sastavni dio teksta zakona i kao takvog ga dostavila Domu naroda u dalju parlamentarnu proceduru s preporukom da Dom naroda prihvati ovakav tekst zakona.

Amandmani su navedeni u Izvještaju Komisije br: 02/2-011-1001-8/03 od 11. 07. 2003. koji čini sastavni dio ovog Zapisnika.

Ad. 3. Obavijest o stanju ispunjavanja postprijemnih obaveza prema Vijeću Evrope – usmena informacija predsjedavajućeg Komisije

Sekretar Komisije informirala je o ispunjavanju jednog od najvažnijih postprijemnih uslova u ovoj godini – usvajanju Zakona o osnovnom i srednjem obrazovanju u BiH. Komisija će u narednom periodu ponovo u širem sastavu, uz učešće svih institucija nadležnih za ispunjavanje postprijemnih obaveza, raspravljati o dostignutom napretku.

Usmeni izvještaj članovi Komisije su primili k znanju.

Ad. 4. Prijedlog Odluke o ratifikaciji Sporazuma o unapređenju i zaštiti investicija između Bosne i Hercegovine i OPEC Fonda za međunarodni razvoj, predlagač Predsjedništvo BiH

Predstavnik predlagača, Anto Grbić pojasnio je odredbe Sporazuma, nakon čega ga je Komisija jednoglasno usvijila i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 5. Davanje saglasnosti za otkazivanje bilateralnih sporazuma između Bosne i Hercegovine i Republike Češke:

- (a) Trgovinskog sporazuma između Vijeća ministara BiH i Vlade Republike Češke od 20. januara 2000. godine,
- (b) Ugovora o trgovini o plovidbi između Kraljevine Srba, Hrvata i Slovenaca i Republike Čehoslovačke od 14. novembra 1928. godine i

**(c) Dogovora o saradnji na suzbijanju povreda carinskih i deviznih propisa od 12. novembra 1976. godine;
predlagač Predsjedništvo BiH**

Predstavnik predlagača objasnio je razloge otkazivanja bilateralnih sporazuma – očekivanje pristupanja Republike Češke Evropskoj uniji, pa su nakon toga članovi Komisije bili jednoglasni da se Domu naroda predloži da donese odluku o davanju saglasnosti za otkazivanje bilateralnih sporazuma između Bosne i Hercegovine i Republike Češke.

Ad. 6. Dokumentat «Opći pravci i prioriteti u sprovođenju vanjske politike Bosne i Hercegovine», materijal Predsjedništva BiH

O Dokumentu je govorio i na pitanja članova Komisije odgovarao predstavnik predlagača Anto Grbić. Razjašnjeno je da je ovaj Dokumentat konačan i, kao takav, već upućen DKP mreži da po njemu postupi. Članovi Komisije su jednoglasno prihvatili Dokumentat, a u iscrpnoj diskusiji formulirani su sljedeći zaključci:

- Komisija daje punu podršku generalnim principima i stavovima iznesenim u Dokumentu;
- Komisija smatra da tekst nije stilski i tehnički na nivou koji zahtjeva ova vrsta dokumenta, te bi ga trebalo u tom smislu poboljšati i to u sve tri jezičke varijante;
- Komisija sugerira predlagaču da se idući put dokumentat ove vrste pripremi u obliku nacrtu koji će se dostaviti Ministarstvu vanjskih poslova BiH i Parlamentarnoj skupštini BiH (odnosno komisijama koje imaju u nadležnosti vanjsku politiku) radi davanja sugestija na predloženi tekst i aktivnog učešća institucija nadležnih za ova pitanja u njegovom kreiranju;
- Komisija predlaže da se, kao prilog ovom Dokumentu, pripremi i Okvirni program rada Predsjedništva BiH i drugih institucija koje su uključene u definiranje i sprovođenje vanjske politike;
- Komisija smatra da je potrebno vršiti ažuriranje Dokumenta, npr. godišnje, kako bi bio stalno aktuelan;
- Komisija smatra da ovaj Dokumentat u ovom času treba u svom sadržaju imati pitanje trgovine ljudima, koje se smatra problemom Regiona i naše zemlje.

Ad. 7. Izvještaj Stalne delegacije pri Parlamentarnoj skupštini NATO saveza sa Proljetnog zasjedanja Parlamentarne skupštine NATO saveza

Izvještaj je jednoglasno usvojen.

Ad. 8. Izvještaj sa Treće podregionalne konferencije Parlamentarne skupštine OSCE-a, Bern, 14. – 16. maj 2003. godine

Komisija je Izvještaj primila k znanju.

Ad. 9. Parlamentarne grupe za saradnju sa BiH, Informacija Ministarstva vanjskih poslova BiH od 20. 06. 2003. godine

Članovi Komisije primili su Informaciju k znanju.

Ad. 10. Preporuke za Samit EU – Jugoistočna Evropa (prevod), Solun, 21. juni 2003. godine

Materijal je primljen k znanju.

Ad. 11. Posjeta britanske Svepartijske grupe BiH, Informacija Ministarstva vanjskih poslova BiH

Informacija je primljena k znanju. U raspravi je aktuelizirano pitanje formiranja grupa za prijateljstvo sa drugim zemljama. Članovi Komisije upoznati su sa zaključkom Kolegija Doma naroda u kome se kaže da je “dogovoreno da se predloži na Zajedničkoj sjednici oba kolegija da se osnuju grupe prijateljstva s drugim državama s time da jedna grupa prijateljstva pokriva jednu regiju”.

Ad. 12. Tekuća pitanja

Komisija je podržala prijedlog predsjedavajućeg da u narednom periodu, u ime Komisije, zatraži sastanak sa novoimenovanim ambasadorom SR Njemačke u BiH NJ. E. Arne Freiherr fon Kittlitz und Ottendorf-om.

Predsjedavajući Komisije

Hasan Čengić, s. r.